



Program setahun bersama Kerajaan MADANI sediakan saringan kanser wanita percuma

Disember 6, 2023 @ 3:42pm

KUALA LUMPUR: Saringan kanser payudara dan kanser serviks akan diberikan secara percuma kepada pengunjung yang menghadiri Program Setahun Bersama Kerajaan MADANI pada 8 hingga 10 Disember ini di pekarangan Stadium Bukit Jalil.

Ketua Setiausaha Kementerian Pembangunan Wanita, Keluarga dan Masyarakat (KPWKM), Datuk Dr Maziah Che Yussof, berkata inisiatif itu dilaksanakan sebagai kempen kesedaran kepada wanita berikutan kanser payudara dan serviks yang semakin meningkat di seluruh negara.

Beliau berkata, saringan kanser payudara membabitkan ujian mamogram manakala ujian Human Papillomavirus (HPV DNA) bagi saringan kanser serviks.

"Pada program minggu ini, kami sediakan 49 klinik sejahtera di seluruh negara untuk membuat saringan berkenaan manakala di Bukit Jalil pula akan ada trak mudah alih yang boleh melaksanakan ujian HPV DNA dan ujian mamogram," katanya.

Beliau berkata demikian ketika menjadi tetamu pada program Selamat Pagi Malaysia terbitan RTM yang disiarkan di saluran TV1, hari ini, sempena Program Setahun Bersama Kerajaan MADANI.

Maziah berkata, selain saringan kanser wanita, kementerian itu turut mengadakan dua pentas utama bagi mempromosikan kempen kesedaran mengenai antigangguan seksual serta kempen perlindungan kanak-kanak.

Beliau berkata, kementerian itu telah menganjurkan Program Jerayawara Kasih KPWKM @Advokasi Antigangguan Seksual sebagai satu usaha dalam meningkatkan kesedaran masyarakat mengenai isu gangguan seksual yang perlu ditangani dengan serius.

"Penggubalan Akta Antigangguan Seksual 2022 (Akta 840) telah diluluskan pada tahun lepas dan diwartakan pada Oktober tahun yang sama manakala tahun ini, kementerian menguatkuasakan sebahagian seksyen daripada akta berkenaan iaitu Seksyen 25 (fungsi dan kuasa pentadbir) dan Seksyen 26 (kuasa untuk membuat peraturan-peraturan)," katanya. – BERNAMA